

In giug denter veta e mort

Marcus Michel e siu tgaun Joya han anflau la dunna sparida ad Aschera

DA SUSI ROTHMUND / ANR

■ **L'emprema dumengia da mars la sera ei ina dunna da 74 onns sparida ad Aschera. Il gliendisdis sissu da miezdi ha ella pudiu vegnir salvada grazia al nas fin dil tgaun da salvament Joya.** Cu il «pager» da *Marcus Michel* dat sinzur sto tut ir spert. Aschia era quei gliendisdis, seregorda Michel: «Jeu erel vid beiber il caffè dallas nov el Tschut cu il 'pager' ei ius giu. Jeu hai immediat telefonau alla Rega che dat a mi in contact ed en quei cass er'ei la polizia ad Aschera. Quella ha giavischau dus teams da salvament da persunas cun tgauns per tscherchar ina dunna sparida. Jeu coordineschel ils engaschis dalla gruppa dil Grischun, aschia hai jeu telefonau ad in collega e nus essan semess sin via viers Schiers. Da Trun ha il viadi cuzzau biebin in'ura, mo suenter 16 onns experientscha sco menader da tgauns da salvament, instructor e coordinatur sai jeu mantener la ruasseivladad da carrar el liug. Tut tenor nua ch'igl ei da tscherchar ed oravontut igl unviern cu nus tscherchein en lavinas vegnan ei cun helicopters per nus.»

Plascherun

Sch'ils teams da salvament cun tgaun vegnan clamai en in liug va ei pil solit per veta e mort. «Pil tgaun eis ei in giug – adina», declara Michel. Joya ei in tgaun dil raz Golden Retriever ed ha prest siat onns. Arrivai ad Aschera han ei igl emprem discurren cullas persunas da salvament el liug e ladinamein ein Michel e siu collega semess alla tschercha cun lur tgauns. «Nus havein partiu il territori nua che la persuna sparida mava savens a spass ed havein tarmess nos tgauns alla lavur, encurend sin spundas teissas, ella planira, en clavaus ed aschia vinavon», declara Michel che dat cuors da salvament el territori e da lavinas en l'entira



Marcus Michel e siu tgaun da salvament Joya durant in exercezi.

FOTO S. CAPAUL

Svizra. Quei ei stau allas 11.25 e gia allas 11.59 ha Michel giu anflau la dunna sparida ch'era sepiarsa ellas caglias. «Joya ha alzau il nas ed ei s'allontanada sur ina canta giu. Jeu hai igl emprem tertgau

ch'ella hagi forsia ferdau auters ch'eran alla tschercha, mo arrivaus sissu quella spunda hai jeu era viu la dunna. Tgei cletgun e con legreivel, la dunna era aunc viva, pudeva denton buca discuorer pli.

Jeu hai dau part a miu collega e cuort controllau la dunna suenter pli grondas blessuras, per fortuna haveva ella buca talas. Allora hai immediat alarmau la Rega ed annunziu ch'ei detti in salvament culla veta», raquenta Michel en ina ruasseivladad e la redactura damonda suenter las emeziuns en in tal mument.

Il meret da tuts

«Secapescha hai jeu emeziuns, il tschaffen ei immens, igl ei gie bellezza d'anflar ina persuna, oravontut sch'ell'ei aunc viva, perquei dedicheschel jeu gie era ton temps liber a quei hobi. Jeu muossel miu plascher e laudel Joya che senta aschia miu tschaffen e sa ch'ella ha fatg enzatgei bien. Cuntrari als trenaments stoss jeu en seracass ligiar en ella enzanua per ch'ella vegni buca tuda neutier, quei ch'ella ha anflau ei da siu avis numnadamein siu», declara Michel e puntuescha: «Era sch'jeu savess internamein bunamein sluppar dil plascher suenter aschia in success, jeu muossel buca quei aschi aviert. Igl ei gie mai mo miu meret. Davos in tal success ei adina in'entir'equipa e mintgin ha ina cumpart dil success. Persuls savess jeu far lidinuot. Ei drova in team per exercitar e per tscherchar e perquei ei in success adina era il meret da tuts.» Cu tut ei vargau muossa el secapescha aunc ina ga siu plascher al tgaun, lauda e fa termagls cun Joya.

In hobi intensiv

Igl um da 50 onns che posseda la fatschenta Michel Sport da Muntogna a Trun ei dapi il 2003 commember dalla gruppa da salvament da persunas Grischun nord. Diesch onns ha el luvrau cun siu emprem tgaun Laica, in tgaun-luf belg. Laica era in tgaun fetg viv e cun grond temperament. Cun ella ha Michel anflau duas persunas ch'eran deplorablamein gia mortas. «Era sche las persunas che nus anflein ein mortas eis ei tuttina

in success. Aschia san ils parents tgei ch'ei schabegiau ed han la caschun da serrar giu», di il bab d'ina feglia carschida ed aschunta che l'entira famiglia segidi ed hagi medemamein plascher da siu hobi. Aschia sustegnien la feglia, sia dunna ed era sia mumma fetg quei engaschi voluntari, autruisa massi quei buc a prau culla fatschenta da sport. El ei numnadamein era aunc menader da Giventetgna e Sport da stad ed unviern, menader da turas dil CAS e commember dil Salvament alpin svizzer e grischun. «Pil salvament da persunas cul tgaun impundel jeu rondund 90 dis ad onn», di Michel. Joya ei il secund tgaun da salvament dils Michels ed era in fetg bien tgaun da famiglia. Joya fuva gia tier la famiglia a Darvella cu Laica ei vegnida malsaua e morta ella vegliadetgna da diesch onns. Cun in onn ha Joya absolviu il test d'entrada sco tgaun per encurir persunas sparidas, cun dus onns eis ella stada scolada avunda per encurir persunas en lavinas e cun treis era el territori aviert.

Anflau sis persunas

Ferton ch'igl ei reussiu d'anflar cun Laica duas persunas mortas ha Michel giu immensa fortuna cun Joya. «Nus havein astgau surdar quater persunas vivas alla Rega, ina ei lu deplorablamein morta en spital suenter enzacons dis», di Michel. Astgar anflar tontas persunas seigi in cletg immens ed extraordinari. «Mo aunc ina ga, ei va mo cun in team ed ei mai il meret d'in singul e siu tgaun – scriva quei», puntuescha Michel aunc ina ga. Pil solit tscherchan el e siu tgaun numnadamein gnanc sco emprem team, el ei numnadamein coordinatur dall'equipa dil Grischun nord e coordinescha ils engaschis d'entir la preferenza a ses collegas. Secapescha seigi ei adina da risguardar tgei ch'ei il pli datier dil liug nua che la persuna sparida vegn supponida.

Restauraziun dalla baselgia da s. Gion a Domat

La pleiv da Domat alla tschercha da donaziuns en favur dalla restauraziun

■ **En las casadas da Domat ei vegniu repartgiu dacuort in fegl sgulont cun in appel da sustegn finanziel per la restauraziun dalla baselgia da s. Gion situada sil crest-baselgia. La gronda part dalla finanziaziun ei bein gia segirada, ei maunca denton aunc rondun in milliun francs.** La caplutta da s. Gion ei in object marcant che dat en egl lunsch entuorn. Ton la baselgia sco la caplutta ed il carner cun ils maletgs murals dil giuvenessendi stattan sco monuments da muntada nazionala sut il schurmetg da confederaziun e cantun. Igl edific historich basegna urgentamein ina sanaziun da-

mai ch'il dent dil temps ha ruis bufatgamen vid la substanza dil baghetg. La «Cumissiuon baselgia da s. Gion» cun l'ugada *Renata Bucher* ha surpriu l'incarica da conservar e restaurar radicalme in la baselgia dil santeri e siu contuorn.

Stuppar la ruosna finanziaria

La finanziaziun dalla restauraziun calculada cun tschun milliuns ei per gronda part gia segirada. La pleiv catolica da Domat ha concediu in credit da 450 000 francs, la vischnaunca politica sco era il cumin burgheis ein promts da sbursar mintgin in milliun francs e confedera-

ziun e cantun han segirau contribuziuns egualas da mintgamai 680 000 francs, aschia ch'ei s'erisulta summa summarum rondun quater milliuns. Cheutras han ins saviu garantir ina solida basa da partenza, aschia ch'ei resta la finala aunc da stuppar ina ruosna da rondun in milliun. Previu eis ei da saver stuppar quella cun «contribuziuns essenzialas d'interpresas e da fundaziuns culturalas sco era entras ina gronda acziun da rimnar donaziuns tier la populaziun». Ferton ch'ins ha gia plidentau interpresas pli grondas han ins derasau dacuort in fegl sgulont cun in cedel da pagament ellas casadas dil vitg. Contactar vulan ins era vischinas e vischins da Domat ch'ei emigrai e laian encrescher sco era persunas privatas cun ina ferma relaziun cun lur vitg d'origin. *Max Lüscher*, expert da finanzas da *Zeras*, ch'ha organisau la planisaziun da finanzas dubeta buca dalla beinvulienttscha dalla populaziun, dallas interpresas, digl artisanadi e dils emigrai che laian encrescher ed ei da buna speranza che quell'interpresa sappi vegnir menada a buna fin.

In custeivel patrimoni cultural

La davosa restauraziun externa ei vegnida fatga avon prest 60 onns e la davosa restauraziun interna avon bien 70 onns. En in'empremetappa duei la renovaziun externa dalla tuor e dil carner vegnir realisada. Allora suonda la renovaziun dalla nav dalla baselgia. Cheu s'extracta ei cunzun da schar tarlischar en nova glischur il custeivel altar principal ed ils altars laterals. En egl dat cunzun igl altar dalla

gotica tardiva cun duas alas cun s. Gion Battesta sco figura centrala che datescha digl onn 1504. Ils dus altars laterals en stil baroc portan igl orsal da 1686 e 1689. En ina tiarza etappa duei allura il contuorn dalla baselgia vegnir formaus da niev. Igl ei previu d'entscheiver cullas lavurs da construziun il mars 2020, sco quei ch'igl architect *Gion Signorell* ha declarau. Igl entir project duei vegnir realisau el decuors dils proxims quater entochen tschun onns.

Il maun public ha gia empermess da sbursar quater milliuns per quella restauraziun, ussa drezzan ins in appel da su-

stegn finanziel era allas interpresas ed als privats. La baselgia da s. Gion cun siu crest-santeri schai fetg a cor als da Domat. Gion Battesta ei il patrun dil vitg ed el embellescha igl uoppen dalla vischnaunca. Plinavon portan era biars vischins da Domat – sco era en Surselva – da vegl enneu adina puspei il num Gion. Els tuts san contribuir alla finamira che la baselgia restaurada sappi puspei tarlischar en sia glischur oriunda e che s. Gion vegni manteniu vinavon pils vegnentssuenter sco patrimoni historic e cultural e sco monument artistic sin la Tuma Tureira. *Claudio Willi/mc*



La magnifica baselgia da s. Gion sigl imposant crest-baselgia.

FOTOS MAD



Igl altar principal en stil gotic cun las alas serradas durant il temps da cureisma.